

重刻咽喉
脈證通論

道光辛丑五月開雕

同治十三年十
二月川東重栞



南京中医药大学图书馆版权所有

重刻咽喉脈證通論敘

咽喉昔人方之輿地固險要之區也扼之抗之並制人之命第其事有相背戾者於地爭得之以制勝至夫疾證則隘於此者危矣然亦未嘗不合人居險地以策勝之疾得隘地以藥瘳之客主之形不同攻擊者之情一也夫治兵無常勢而用奇者勝姜維守劔閣鍾會攻之未能克鄧艾由邪徑趣涪吳人於江險磧鐵鑕橫截王濬火燒液之並筏去鐵錐咽喉之用甘桔湯蜀人之劔閣吳人之鑕錐也此脈證通論一書相傳出宋時杭千佛寺僧囊中共十八篇皆精要無類吾友許子槿嘗采之生人不可計世固不知其用藥禁忌一篇昔人皆昧之所謂吳人蜀人之蔽者也亦猶七國之韓欲援之而欲以折之固必有道在矣因續授之梓而記之

道光二十有一年歲在辛丑閏三月吳興姚晏芳林北堂書

...



醫家十三科咽喉居其一誠以氣之出入生死之關事醫者不可不審求也內經曰喉主天氣咽主地氣欬論篇曰心欬之狀欬則心痛喉中介介如梗狀甚則咽腫喉痺厥論篇曰手陽明少陽厥逆發喉痺咽腫瘰脈解篇曰厥陰所謂甚則咽乾熱中者陰陽相薄而熱故咽乾骨空論篇曰督脈生病治督脈治在骨上甚者在齊下營其上氣有音者治其喉中央在缺盆中者其病上衝喉者治其漸漸者上俠頤也謬刺論篇曰邪客於手少陽之絡令人喉痺邪客於足少陰之絡令人咽痛不可內食又曰咽中腫不能內唾時不能出唾考內經所言喉證者凡謂臟腑之氣痺著於其地而已無所謂十八證三十六證也惟靈樞癰疽篇岐伯曰癰發於咽中名曰猛疽猛疽不治化爲膿膿不寫塞喉半日死則類喉科之乳蛾而屬之癰疽仲景去

先聖未遠其金匱玉函所載雜病並無喉證正與內經相合李東垣劉河間爲金源巨手所著諸書亦不載是證獨朱丹溪有喉痺一門第以臟腑爲主分經施治則亦內經之支也海甯許珊林槿得喉科書一冊於其鄉之世業是醫者題爲宋異僧所遺以其篇第攷之卽所謂十八證也先總論病態而繫以藥後詳方證復列用藥禁忌且以甘桔湯爲喉證所忌一掃俗醫誤執成方之謬是能獨具手目者以其喉證爲火毒上升用藥降氣瀉火爲主卽靈樞猛疽之意也其以病起何經用何藥主治卽內經丹溪之法也夫善讀軒岐書者固可隔垣洞見何待檢閱之煩然則此書之作蓋爲俗醫設也且爲無醫設也俗醫與無醫則此書之功偉矣珊林因舊刻之訛重勘而精梓之家兄聖常惜其傳之不廣也郵寄本重鉅因括其大凡於左道

光辛丑閏月之望吳興姚衡書於廣州撫使者署之雨春

館



北京中医药大学图书馆版权所有

校刻咽喉脈證通論序

或曰宋有異僧者寓杭之千佛寺遣一囊去寺僧啓之得是書秘不欲傳今尙有能世其術者余曰唯唯否否夫方技之書類多託於畸人異士隱僻恠誕者流神其說以炫人耳目是書苟宋人作也不應有棉花瘡云云此疾元時始入中國何先數百年已能言之鑿鑿如此邪第綜其方論凡夫喉證之虛實緩急辨析造微多所依據則知非近人所能苟非宋亦不出元明間一巨手耳余先後獲四五寫本率爲庸妄人竄改塗乙故各各不同及見禾中栞本益紕繆滋甚因卽數本中排比參校窮數月之力如理亂絲不啻數棼之而數析之也今年夏手錄定本友人楊子星泉見而韙之星泉今俞附也殆不至阿私所好以貽誤後人者還授之梓以永厥傳簡首仍署曰宋僧原本亦疑

以傳疑意爾夫豈敢神其說以炫人耳目哉是爲序
道光五年乙酉六月海昌許榭謨

外校即迎服齋齋齋齋



南京中医药大学图书馆版权所有

咽喉脈證通論

總論

通治用藥

用藥禁忌

丸散方藥

牛黃解毒丸

紅內消散

保命丹錠子

膽冰消毒散

冰硼散

玉屑散

鎖喉第一

加減荆防敗毒散
加減柴胡雙解散

重舌第二

氣癰第三

乳蛾第四

弄舌第五



纏喉第六

啞瘴第七

骨槽第八

加減當歸連翹散

懸螞第九

加減千金內托散

爛喉癰第十

犀羚貝母膏
百寶丹

熱風喉癰第十一

涼血地黃湯

弱證喉癰第十二

喉閉第十三

四順理中湯
四逆湯

倉食第十四

當歸連翹散
川桂散

發頤第十五

南星膏

懸癰第十六

喉菌第十七

牙癰第十八



總論

夫喉者吾生氣機出入之門戶瞬息存亡之際性命係焉
偶一受病危在須臾迫不及待所貴醫者能識受病之原
與夫虛實痰火風寒熱毒之異更於望聞問中參究脈理
尤爲先務之急自來業喉科者全不講脈所以治之鮮効
今試論之假如其脈洪大而實其人氣粗而躁此有餘之
證用藥則以散風下氣清火消痰散之者荊芥防風羌活
獨活紫蘇是也下之者枳殼枳實青皮厚樸山查前胡是
也清之者山梔黃芩黃柏甚則犀角黃連消痰則以膽星
樓仁杏仁爲主若脈洪大而浮軟無力或絃緩而澀其人
氣委而靜此不足之證用藥則以涼血生血滋潤消痰涼
之者丹皮白芍是也生之者生地當歸是也潤之者苡仁
知母花粉是也消痰則以貝母樓仁杏仁兼用山梔黃芩

黃柏犀角黃連或有純是陰脈者或有純是陽脈者當以
病治病脈不與焉卽以荊芥防風牛蒡射干黃芩枳殼銀
花獨活生地丹皮花粉爲治再以保命丹或紅內消同服
日用吹藥夜用噙藥無不見效更有一種熱病而服熱藥
火毒熾甚而發於喉間大寒大熱疼痛不止或舌脹而本
伸縮不能飲食難進其脈洪實有力大便不行宜急下之
若脈洪弦而浮無力宜涼血行血爲主若過用疎風散火
之劑恐變別證最稱難治又有一種出外急走遠路脫力
而傷肺氣喘息難舒以致喉痛舌脹地閣下腫突如鎖喉
之狀內視之非重舌外視之非痰毒寒熱大作痰涎洶湧
六脈洪大中空面色發黃而浮初以防風通聖散探之或
效一二卽以涼血生血順氣之藥治之又有似喉證非喉
證者其喉亦痛牙關緊閉胸脇疼痛或腹脹痛四肢攣厥

作痛此因受有重傷或用力太過致瘀血凝滯當以行血破瘀爲要初起可救過五六日不治又如弱證喉癰雖是肺經之病亦有兼他經而起者何以知之假如喉閒紅癰作痛是肺經火盛之故若頸項之筋有時或左或右作脹而梗氣悶不快此怒氣傷肝左關脈必洪大而弦當清肝火以舒筋涼血爲主用藥則以當歸牛膝佐以柴胡黃芩羚羊若兼右關微弱而緩乃脾胃有虧須兼用白芍茯苓此肝脾與肺共病也喉閒紅癰作痛其舌紫色或生刺作痛或作木乾枯是心經受虧無血榮養以致虛火熾盛且兼思慮過度鬱氣所成左寸脈必浮洪當以犀角黃連爲主佐以當歸白芍此心與肺共病也喉閒紅癰作痛滿脣焦裂口熱如燒或作乾嘔是胃經虛火熾盛右關脈必洪弦且緊當以山梔黃芩爲主佐以當歸白芍山藥此胃與

肺共病也喉閒紅癰作痛夜閒舌乾口苦湯水不進或有
嗽而無痰更兼滑精者是腎水枯竭虛火上炎兩尺脈必
洪數無力當以山藥知母黃柏爲主佐以花粉澤瀉白芍
茯苓此腎與肺共病也若夫肺經獨病或吐血而成或嗜
酒而發或脾瀉而生氣血消散嗽重聲啞喘急痰多聲如
曳鋸睡臥不得六脈洪大而浮肺部更甚當以苡仁山藥
貝母黃芩樓仁牛蒡爲主佐以當歸白芍熟地茯苓丹皮
犀角黃柏知母服之喉痛雖止然不過待日而已更有六
脈沈隱神脫氣敗飲食不進步履不前盜汗自汗如雨脾
氣溏泄死無疑矣若年老人喉閒紅癰作痛或舌上生刺
或破腫或木脹言語不清六脈微洪五至有餘飲食動靜
形色神氣如常此血少火盛當以黃芩丹皮茯苓熟地當
歸白芍爲主佐以元參牛蒡枳殼銀花花粉山藥苡仁甚

則加犀角黃連不同前論若小兒痘後或瘡後患此當以犀角黃連敗其熱毒更以涼血補血健脾之藥佐之飛草參芪斷不可用此外用藥與大人相同若女人胎前患此者先以安胎爲主次以涼血爲佐紅內消保命丹忌用餘藥無妨產後一月未滿者當以熟地當歸補血枳殼青皮下氣元參射干牛蒡元胡索銀花消腫少加黃芩花粉以清熱紅內消保命丹可用但不宜多吹藥噙藥忌之如經期適來當以破血下氣之藥爲主涼血者少用紅內消保命丹噙藥服之亦無忌茲論其大畧如此餘詳各條

通治用藥

夫喉證向有三十六法今余列十八證名目雖簡而治法已備要之十八證中又可以風與痰與火概之凡遇此證不論緩急只以下氣消痰爲主次則清火涼血若不分先

後混亂用藥貽害匪淺今開用藥大概於左惟高明者臨時參用可耳

藥用防風前胡丹皮獨活各一錢杏仁樓仁山查各三錢車前木通各八分兩劑後加山梔膽星各一錢生地二錢如火未息加黃芩一錢以保命丹紅內消同服

誤用黃連半夏生薑桔梗之類難以收功照前方加羌活獨活服幾劑自愈

牙關難開須加真北細辛一分

單蛾雙蛾至八九日後方可用鍼刺出毒血未滿十日萬不可刺

或有疔瘡根腳紅內消不可用用之反凶煎藥中加地丁草七八錢自愈保命丹可服

頸閒痰毒須加象貝母草河車猴薑若日久難愈以蝦蟇

